



UKA 2025/166

4/11-2025

Napaartoq Petrussen

Namminersorlutik Oqartussat pigisaanni, pisortat suliffeqarfiutaanni misissueqqissaarnermi iluaqutaasinnaasut aamma ajoqutaasinnaasut selskabit niuertorpalaartumik ilusiligaasimanerannut aaqqissuussisimanermi siunertaqartunuinnaanngitsoq taamaattorli aamma immikkuullarissumik politikikkut qajassuussinissaq pillugu UPA2026-mut saqqummiussinissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pele Broberg, Naleraq)

(Siullermeerineq)

Inatsisartunut ilaasortap Pele Broberg-ip siunnersuutaanut Demokraatit aallarniutigalugu qujarusupput.

Demokraatit isumaqarput, inuiaqatigiit ingerlalluartut inuussutissarsionermik ingerlalluartumik tunngaveqartut. Ineriartortitsinissamut, nutaaliornissamut, nammassisaqarsinnaanissamullu unammilleqatigiinneq ingerlatitsisuuvoq. Tamanna pillugu namminersorlutik suliffeqarfiit pisortanit ajornerusumik inissillugit pisortat niuerfimmi akornusersuinngisaannarnissaat, imaluunniit unammilleqatigiinnermut sunniinngisaannarnissaat aalajangiisuuvoq.

Ingerlatseqatigiiffiit pisortanit pigineqartut pingaarutilinnik sulissaqarput, arlaqartullu inuiaqatigiinnut pingaarutilinnik suliaqarlutik. Taamaakkaluartorli ersarissunik sinaakkuteqarlutik inuussutissarsionermik tunngavilimmik ingerlanneqarnissaannut tamanna allannguinnilaq. Unammilleqatigiinneq akornuserlugu pisortat ingerlatseqatigiiffiutai iluaqutissaqalerlutik inissinngisaannassapput. Taamaattoqassappat tamanna oqimaaqatigiinnginnermik pilersitsissaaq, soorluttaaq siuariartornissamut, suliffeqarnermut, akileraarutigullu isertitanut naggataatigut tunngaviusumut, namminersorlutik inuussutissarsiutillit ineriartornissaannut akimmiffiulluni.

Misilittakkat takutippaat, aktianik piginneqatigiiffiit piusut sinaakkutigisatta iluini ingerlalluareersut. Ingerlatseqatigiiffioriaatsimik nutaamik pilersitsinngikkaluarlutik kiffartuussinissamik isumaqatigiissutit, immikkut akuersissutit, immikkullu inatsisit aqqutigalugit immikkoortunut politikkitigut suliassat naammassisinnaavaat. Tamanna eqaassuseqartitsillunilu ersarissuutitsivoq, ingerlatseqatigiiffiillu ataasiakkaat sunniuteqarluartussamik, ersarissunillu anguniagalimmik ingerlanneqarsinnaanissaannik qulakkeeraluni, ilutigisaanillu inuiaqatigiit soqutigisaat isumagineqarlutik.

Ingerlatseqatigiiffioriaatsimik allanngiineq imaanngilaq naleqarnerulersitsissasoq. Killuanilli atorfillit pissaaneqarpallaarlernissaannik, politikikkut aalajangikkanik pisariaqartitsinerulernermik, ingerlatseqatigiiffiillu periusissiatigut ingerlavissaanik nalornilernermik kinguneqarsinnaavoq. Tamanna pillugu politikerit sinaakkutinik aalajangersaasartut aamma ingerlatseqatigiiffiit siulersuisui ulluinnarni ingerlatsinermut akisussaasut, ersarissumik immikkoortinneqarnerisa attatiinnarneqarnissaa

UKA 2025/166

J.nr 00.00.00/25EM-LABU-00166

Qupp. 1



pingaaruteqarpoq.

Maani aningaasaqarnerput allanngujuissusermik, siumut nalunangereersutsimik, tatiginassutsimillu pisariaqartitsivoq. Taamaassappat suliffeqarfitsinnut malittarisassat atuuttut tamanut assigiittariaqarput. Namminersorlutik ingerlatsisut naapertuilluartunik atugassaqartinneqarlutik unammillersinnaasariaqarput, pisortallu piginnittutut ingasaassinaveersaarnermik, akisussaaffimmillu takutitsisariaqarlutik.

Tamanna pillugu massakkut aaqqissuussisimaneq pigiinnartussanngorlugu, ilutigisaanilli aamma pisortat ingerlatseqatigiiffiutaasa qanoq ingerlanneqarnerat ataavartumik naliliiffigineqartarnissaat qulakkeerlugu Naalakkersuisut allannguutissatut siunnersuutaat Demokraatit tapersorsorpaat. Tamanna isertuaatsuunermik siuarsaallunilu unammilleqatigiittarneq illersorlugu oqimaaqatigiissitsineruvoq.

Taamatut oqaaseqarlunga Demokraatit inassutigaat, Naalakkersuisut allannguutissatut siunnersuutaat ataatsimiititaliami attuumassuteqartumi oqaluuserisassanngorlugu ingerlateqqinneqassasoq.